

郭襄靖公遺集

郭襄靖公遺集卷之十三

甫中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

諸議

廣西布政

會議儀節

爲省繁文以敦交誼事昭得僚采之義昔人比之

墳簾言同聲之應也相益以道共濟以心君子之朋蓋如此其若繁縟是競而忠信或漓形迹徒拘而肺腑不能相照非所以語協恭而追雅道也今將酌定儀節開列如左凡我同心期共守勿替焉是今日同盟之意

一先輩相呼以字非尊長不以翁稱近來失之太濫至有稱諸非族者况奉有明禁尤宜恪遵今後往來啓事及稱謂之間首以爲戒

一投刺所以通名先輩彼此謁訪帖僅寸餘即書

問相通不越數幅謂之尺素近來無故輒用長  
箋至尋常謙集贈賄動施紅柬殊屬無益今後  
惟到任陞任三司公宴用四幅紅柬其各司公  
賀公請公贐及一切交際俱用白柬平時相拜  
只以單帖

一四拜之禮惟父師當之近來交接以四拜爲常  
儀至加三四叩首者禮頗且過今後不問初會  
臨別與本司別司俱通行二拜禮間係同鄉同  
年及有舊雅者加二拜其相會只序次一揖不

另揖亦不旋揖在公所則公揖有應答者加一揖或因事拜訪遇晴明則答如已昏夜及風雨之時不拘當日回拜之禮其商議公務及偶爾相遇者不答凡主人於賓賓於主人如舉席整椅之類統於首坐不必紛紛交看

一公私宴飲禮不可少所貴情洽意真不必過腆徒費無益殽饌不過十器蔬素不拘湯不過五行請柬止遣吏承不必親送至赴席太遲夜分始徹尤屬不便不惟隨侍人役候伺艱難且藩

司有庫藏之防閑臬司有獄囚之禁繫都司有  
城門之啓閉所關尤重今後每會早則未刻遲  
至申初不繼以燭燭至則首席告行筵品之未  
盡所不計也若主人邀客太遲則辭不敢赴

一到任陞任齊捧應朝三司公宴併歸一席已無  
容議如起程從容各司尚有私宴只請本公司相  
陪不必槩請其郊外公餞本公司設席二司各出  
分子五錢以見共設之意如由水路者三司仍  
各携饌盒移舟里許一話別情

一新任初巡舊規有湘南樓之錢係本公司自設各司同在主席但各道分署外府動經逾年此禮必不可已若原在司省駐劄暫以公行往返不出旬月湘南錢席似可無設其初巡回司代下程三星禮薄意真相應仍舊

一凡到任陞任舊規各以書幣私賀後覺繁瑣易以公賀折果酒銀五星近復兼公私行之旋舉旋返殊爲文具今後公賀仍舊不必私賀如陞係公祖則有鄉大夫之禮不在此例

一陞任齋俸應朝贐禮本公司各有舊規難以定議  
各司公贐三兩外有私贐之禮初以苓香青布  
從事或量折帖儀近來各伸私情往往參差不  
一間有不繼之嘆今後公贐仍舊其私贐定以  
代香布一星係鄉曲通家者量加扇補之類不  
必過強

一各司賀贐之規雖不甚厚亦不爲薄惟吊奠之  
禮太簡舊規遇有丁憂他故惟本公司具儀二兩  
祭軸一幅各司止於列名而已或因地方遠隔

至有廢而不舉者似非厚道今後萬一有此二司各具公禮二兩本司加二兩其係大故者即破格倍處亦不爲妨各司仍列名祭軸以示同服之情如已先行本司遣吏送至其家毋至因循廢禮

一去任之行與陞任不同舊規有公宴而無盤盞至餧遺之禮亦殊寥寥今後遇此除盤盞仍舊不具其餘公私餧餧一如陞任之儀

一僚義之篤不專於儀文交際之間蓋猶有切偲

之道焉吾儕所敬共者公事也所主持者公議  
也所以對天地質鬼神者公心也心惟其公雖  
相規相諍不失其爲厚相持相格不害其爲同  
不孰已見不擅已稱不必功自己成議自己出  
凡以濟公事合公議而已吾何容心哉孔子曰  
君子和而不同

一人之相知貴相知心過動過言大賢而下所不  
免也吾儕相與日久相會日勤旣已脫略形骸  
安能無一事之違一言之失耶所貴知已不惟

相亮尤在相忘其或因睚眦之故輒起猜嫌之私隘亦甚矣噫嗟以四海九州之人聚首一方不啻天涯骨肉異時其子若孫有能延世講者猶曰吾父吾祖與若父若祖於某省爲同僚至相念不忍棄置曾以身相聚晤之日迺至失德其何以爲心耶詩云矧伊人矣不求友生神之聽之終和平

宗藩事宜議

爲查議宗藩急切事宜以消地方隱憂事奉

欽差巡撫都御史殷正茂并蒙巡按御史李良臣案  
驗前事備行到司將宗藩事宜從長建議等因該  
本司會同按察司并守巡各道議照今

國家之事莫大於 宗藩亦莫難處於 宗藩而

靖藩之難處則又有甚焉者蓋地方獨遠禁網素  
寬生齒旣繁貧窮尤衆自題立房長之後朝參之  
禮盡廢名封之請愆期情義乖離威權陵替至于  
今極矣以故諸宗無所顧忌瀆倫踰度縱恣多端  
擁擾公門橫行郊市甚而攫金越貨莫敢誰何小

民生理日就蕭條緣之棄耕作趨盜賊者未必非職此之故若不早爲之圖則祿費益廣公帑益虛閭閻益困腹心之患誠有如本院所憂者顧勢窮必通而事貴有漸易之革曰已日乃孚言變革不驟亨之道也欲爲千百年長計若非剏量於其間以漸行之卒而疑駁阻格反以多事於國家何利哉今之議者謂宜稍倣漢制列侯庶子之法藩王封三子將軍封二子中尉封一子一世而止其餘諸子若藩王者給之銀六百兩將軍者給之四百

兩中尉者給之二百兩意誠善矣但廣右荒瘠之  
區諸宗素無厚積所資以居養者歲祿而已相沿  
二百餘年一旦限而削之長而得襲者祿入僅足  
以自供以次子弟不得沾升斗之祿恐不均之號  
羣然起矣雖有議給之貲然侈靡性成旋多浪費  
嗷嗷待哺其不相率爲非者有幾耶議者又謂宜  
稍倣唐制王家支裔流布民間將中尉而下散處  
郡邑授之間田以代其祿其意亦善但廣右宗室  
甚繁間田有限以荒蕪不治之壤令其懇播情已

不堪以民夷交錯之區同其聚處勢尤可慮况安  
土重遷人情之常棄墳墓離戚屬有搬移之苦有  
卜築之煩其甘心就徙者有幾耶議者又謂宜稍  
倣宋制袒免而下不復賜名士農工商各從其便  
其意亦善但廣右諸宗名封久停幼而力學者蓋  
鮮矣以長大之年令之業詩書應制舉未必即登  
仕籍祿俸足以自贍也以豢養之身而驟爲農工  
商賈之業亦未必卽收厚利俯仰足以自資也饑  
寒切身雖慈母不能保其子求其守分循理難矣

况棄冠裳之貴從事於粗鄙之流則其怙勢作威  
虐民侵利又將何所不至耶由前三議非策之不  
可行也行之於廣右非以其漸不可也漸之云者  
寓樽節轉移之意於詔爵命祿之中使之寢殺寢  
微克勤克儉則所以自爲謀生之計者已素預矣  
然後惟吾所處無不相安所謂已日之孚者是也  
何疑駭阻格之足患哉故爲靖藩計者必寬名  
封之例以安其心酌迤減之法以制其祿二者其  
大要也而又復朝參之議以正其紀明房長之義

以一其權飭宗學之規以端其趨伸拘禁之法以  
遏其暴開舉首之條以防其奸篤親睦之情以聯  
其漁如此行之教養並舉恩義兼施則諸宗久而  
習習而安將日就于規矩法度之中相忘於悠久  
熙明之化與國咸休而邊徼地方永享平寧之福  
矣今將欵條開列于後伏候

裁奪施行

計開

一寬名封之例以安其心照得 靖藩宗室已

食全祿者七百餘位而前後請封宗幼任雲  
等五起凡百五十三人請名宗幼社丑孫等  
八起凡四百四十四人請祿宗幼經諱等共  
五百九十八人節奉駁查未經題給蓋部司  
旣慮本省稅糧所入不足以敷歲祿之供亦  
以 靖藩諸宗婚配向不奏選亦無封號與  
近頒條例多有不同復行勘報無非慎名封  
以杜冒濫之意但廣右僻在西南去京萬里  
且地方凋敝差遣煩難是以自

祖宗以來凡子孫婚配惟 王長子奏選其餘將軍  
中尉自來止請本身名封待年歲及期則禮  
娶良家子女以食祿之日方將所配姓氏造  
入玉牒類報一向相沿並未奉有查駁誠憐  
恤遠藩之故也查之部劄內云自弘治至今  
七八十年該府請名封者本部明知擅婚子  
女無不槩與題覆以致彼亦恃爲當然不復  
顧忌蓋洞察之矣今若繩以不合奏格則目  
前之應名應封者盡爲擅婚子女再傳而後

更復何望卽今閩府宗幼時當婚媾而猶稱  
乳名年已壯強而未加冠服無所繩檢益恣  
兇強類聚羣呼動至數百其驕橫無藉殆有  
不可以勝言者隆慶元年該撫按衙門權宜  
議處將已請名未封者給祿米三分之一年  
十五以上請名者給米一石十五以下者給  
米五斗而填門告擾今猶未已若不破格奏  
處則愈積愈難愈窮愈橫固非諸宗之幸尤  
爲地方之憂也再照名封之請王府差人齎

奏此定例也但差人指稱浩費而科斂常多  
往返至再則需求愈廣是名封未得而債逋  
已深徒爲差人利耳合無題

請今後凡宗幼應名應封者長史司務要預呈撫按  
衙門轉行布按二司勘結明的轉詳批允方  
行啓 王題奏仍乞部司俯從寬恤免其重  
駁以省差人科索之弊尤寬恤之一端也

一酌遞減之法以制其祿照得名封旣難停革  
則歲祿所當預籌除本色祿米係桂林府廣

儲倉支給外其本省所屬額解布政司民屯糧銀歲止四萬三千有奇而逋欠常十之二見食全祿宗室儀賓七百餘員每年祿鈔約用二萬九千餘兩三衛官軍及司府官吏人等每年糧鈔約用一萬餘兩是歲額所入不足以供所出每取足於外省之協濟近歲之奏留若益以新封六百員之祿何所仰給今見在者固難遽裁將來者猶可酌處與其名封盡革等於齊民孰與以漸而裁使之均霑

德惠之爲愈哉今諸宗之祿將軍以三七折  
鈔中尉以四六折鈔縣君鄉君儀賓以二八  
折鈔然查之廣西桂林等府知府該月俸二  
十四石本色二石折鈔二十二石是實支僅  
十之一也必不得已倣而行之將軍以二八  
折中尉以三七折縣君鄉君儀賓以一九折  
不亦可乎諸宗之折鈔每米一石鈔二十貫  
每鈔一貫折錢二文查之廣西都司衛所等  
官每月俸一石折鈔二十貫每貫折錢止一

文必不得已倣而行之不亦可乎諸宗折糧  
每米一石銀四錢查之廣西各府衛大小官  
員俸糧每石俱折銀三錢五分必不得已倣  
而行之可也其猶不足逾若干年遞而減之  
至於三錢又逾若干年遞而減之至於二錢  
五分極而至於二錢似亦無不可者自茲而  
猶不足則歷世逾遠中尉而下但令奏報宗

支紀名

玉牒給以冠帶榮身聽其相生相養各成世業或應

舉自效或力田自給或分布郡邑以自治其生固其漸之所必至也蓋勢窮理極不得不變而通之在諸宗亦自計之熟矣何處而不得哉又查庶人口糧六石俸鈔兼支各省通例也而本省庶人月得實支六石按月請給是庶人之食無減於中尉矣倣而裁之可也又縣君同儀賓歲支祿鈔各一百五十石鄉君同儀賓歲支祿鈔各一百石已屬過厚而縣君鄉君已故者儀賓猶得食其本祿濫矣

從而革之可也又將軍中尉之妻歲有養贍  
或實支五十石或實支三十石未經題

請者月支米一石蓋爲寡而無依者設也而子食全  
祿者亦槩給之濫矣今已前者姑存之以後  
不論將軍中尉之妻必無子食祿者月給米  
一石餘俱不給之可也此其所省雖不甚多  
然歲計有餘不可充所費之十一哉

一復朝參之儀以正其紀照得天下所以維持  
綱紀者分焉而已分之不明亂之道也本潘

歷代相承有朝參之禮有盡押之規無敢有  
違越者自嘉靖三十六七年間諸宗遂廢不  
講甚而

聖節慶賀

祖廟祭享無一至者不復知有

朝廷不復知有

祖宗况藩王乎渙散分裂無所統攝毀禮蔑法此其  
階之其漸不可長也合無題

請嚴責宗衆務要昭舊遵行以明文至日長史司刻

定日期通諭知悉初次預報三司并守巡各  
道親詣 王府查其有無如禮舉行以後每  
朔望日期朝參一次仍分番畫押以爲常規  
有不至者 王府量行戒飭抗違三次者長  
史司開呈兩院先將祿米停支一面叅奏處  
治以爲背玩之戒庶禮達分定無復乖離橫  
恣之患矣

一明房長之義以一其權照得房長之設始自  
本藩奏行然向由 藩王自行選立有不當

者輒易之故宗庶統於房長房長統於藩王無異議也後因撫按衙門爲之疏名題立而一二挾仇之輩遂自謂

欽立房長非藩王所能統已背公樹黨恃衆脅權而各輔卑幼亦惟知有房長不復知有藩王矣驕抗成風陵夷至于今日不親其親不長其長至有骨肉相殘及利盡而反相賊害者又不復知有房長矣蓋房長不聽命於

藩王則宗庶不聽命於房長下陵上替其勢

然也藩府地方從此日益多事矣合無題

請行令各輔房長有自願告退者各從其便聽 藩  
王另行選立其餘房長自今以始各安分義  
務要嚴束宗庶朝參如禮盡押如期如再抗  
違不至長史司具呈兩院叅奏處治庶事權  
專一而陵替可少振矣

一飭宗學之規以端其趨照得先王之制自王  
宮國都以及閭巷莫不有學蓋以明禮義端  
趨向必由學得之是以脩明宗範列於宗藩

條例之首誠重之也頃歲本省遵議奉行已  
將麗澤書院改立宗學旋以他故而寢宗幼  
緣之以告支月米一石及三分之一者比比  
而學竟不立何以消驕恣之習而成禮教之  
風哉合無遵照條例着實舉行將麗澤書院  
重加修葺選取本府紀善教授有學行者爲  
師將宗幼年十五以上者盡數送入宗學准  
月支米一石其已經請給者不許重支長史  
司總查若干名開報提學道定爲三班日輪

一班赴學聽講其所講習不出經書大義及  
皇明祖訓大明律令諸書提學道時加校訪每年終  
一定等第呈報兩院其篤志循禮通曉經訓  
者爲上等趨向不汚稍通文義者爲中等放  
蕩不率教者爲下等累考一等者給祿鈔三  
分之一二等者仍舊支月米一石下等者革  
其月米以激勵之至於年長有爵不赴宗學  
者又行司道時加咨訪如其立身行已守法  
盡倫捐恤貧宗訓督卑幼者會呈獎勸間有

背逆兇暴蔑視

憲典及放鷹逐犬挾妓遊江賭博酗酒擾害地方者  
亦訪實啓 王責治其尤甚者參革斯亦勸  
懲之一道也

一伸拘禁之法以遏其暴照得宗室之驕橫爲  
暴者固由 藩王不能統攝亦以監司之法  
不行而間宅之禁未嚴也今之有爵祿冠裳  
者且不暇論卽五尺之童視大寮畧無顧忌  
歡呼倨坐習以爲常雖放充之奴隸住店之

細人皆有所恃而衝突叫號不復畏避欲一  
查究則逃入第宅之內動稱某輔之人卽官  
司隨從人役明知之不敢一加呵叱蓋積威  
所刦也而庶人之禁閒宅者又時或逸出得  
以附黨相助爲非或近而村民入城貿易遠  
而州縣解領錢糧被其誘禡竊奪者不可勝  
計若不行拘禁之法則愈趨愈縱莫知其所  
終矣蘇轍所謂臨以監察持以察吏威以刑  
禁使不材者不至虐民賢者有以自效誠今

日之所不容已也令無題

請少寬例禁凡宗庶有占 王府士民園池者查明

責令吐退還業其家人及住房人等但有玩

侮官司虐害小民不問在宅在街聽司府各

衙門徑行拘究如或占悞不發查所犯輕重

一併啓 王重加懲治應禁閒宅庶人照舊

規鎖鑰付按察司掌管以時差官啓閉如有

逃出卽住口糧仍坐差官守門者之罪若屢

逃不悛查實題參送發高墻禁住庶各宗均

有所憚而不敢違矣

一開舉首之條以防其奸照得宗藩條例濫  
妾有禁花生有禁抱養有禁凡所以重宗支  
之義杜冒濫之奸也

祖宗以來家法嚴密弊無所容頃歲諸宗藩行妾媵  
之收率多踰制驗生之例遲至終年及宗室  
食全祿宗婦食養贍者間有物故未必卽報  
住支雖取勘於房長左右隣人等而扶同容  
隱視爲故事若不開舉首之條則紊序瀆倫

虛名冒祿其弊將日長矣合無題

請今後各宗務要恪遵禁例嚴肅家規凡子女初生  
卽便啓 王照依舊規差內官同長史房長  
卽時驗看不得需索鞋帕筵席通同捏報宗  
室宗婦但有事故者房長卽日移報長史司  
轉報布政司截日住支祿鈔如有濫娶花生  
抱養等弊及有事故朦朧造支祿米者許各  
宗室并親屬隣佑人等赴官舉首賞銀三十  
兩所犯宗室輕則削減祿米重則降革爵秩

則奸弊庶乎可免矣

一篤親睦之情以聯其渙照得 藩王之於宗  
庶固云統之以分亦當聯之以恩諸宗之不  
遵約束誠於

祖訓有違然亦獻助之議處置失宜有以激之也今  
諸宗黨與漸分已駁駁有悔罪之意矣若  
藩王不厚加憐恤猶以舊嫌爲念則諸宗終  
無遷善之期 藩王愈成孤立之勢豈太平  
之世所宜聞哉合無題請

天語叮嚀 靖江王自今以始痛釋前仇凡諸宗名  
封祿米等項應奏請者速爲奏請應勘結者  
早爲勘結應撫按代奏者預行長史司呈請  
代奏如諸宗有犯則拘至

祖廟之前會集長史房長諸人薄責示警其銅鈕銅  
鍊墩鎖等刑非不法之甚者不得輕用仍嚴  
禁內官旗校人等不許凌辱宗人違者必治  
不宥則諸宗感激愧悔莫不思所以報涵育  
之德其孰敢不遵道遵路以自犯刑章者哉

轉移之機是又在藩王亟加之意焉耳

申肅覲典議

爲申嚴明禁以重

覲典以肅官常事照得隆慶五年係大計羣吏之歲  
天下諸司例應入

覲節奉部院勘合嚴禁應朝官員自定額盤纏之外  
不許指稱科斂索受饋遺禁諭諄嚴已經通行所  
屬遵照外但弊政每沿于積習常情易忽於細微  
况廣右爲西南絕徼禁網素疎寇盜繁興民生凋

敝寬恤之政尤所宜先者也訪得各府州縣往年  
掌印首領等官每當觀察之年預爲誅求之計指  
稱上司多方派取或曰僦舍搭蓬或曰催皂賃馬  
或曰設席供飯或曰辦送下程犒賞手下及紙劄  
心紅油燭煤炭之類種種不一又於所屬各官或  
受其水手二名四名者或受其綢葛絲絹十疋二  
十疋者或於各驛遞巡司取其折價長夫若干名  
長馬若干疋收價弓兵防夫若干名者上下相沿  
恬不爲怪甚至督以文移加以罪罰而取盈焉者

亦或有府官不受而州縣不以散還小民或州縣  
官不受而糧里不以散還小戶以故苛政日施窮  
氓日困而淪胥爲夷爲盜者未必非此之由也近  
年以來郡邑正官多係科名之選類能謹守官箴  
勤恤民隱沿襲之弊翕然丕變然闢革之流佐領  
之輩吏胥門皂之言易入而因循苟且之念易生  
亦難保其盡無也本職例有入

觀之行實叨率屬之責若不申嚴明禁所屬仍踵前  
弊則本職之罪責均不得辭何以逭誅罰於

聖明之世也耶合候呈詳允日差人星馳移文宇巡  
各道弁各府轉行州縣正佐首領等官務要恪遵  
部院明文一切科斂接受稱爲常規者盡行禁革  
如有指稱上司應朝費用科派小民者卽平日官  
守無虧必註下考以聽部院議黜其甚者參呈兩  
院論劾革職仍行提問如律各府仍卽備云大書  
告示發各州縣張掛通衢遍諭小民知悉如此庶  
法紀益振吏治益清民困可以少蘇地方可以少  
靖矣

剿撫古田議

爲議處古田早定撫剿大計以復縣治事隆慶四年六月十九日奉兩廣軍門李案驗准兵部咨前事案仰本司着落當該官吏照依備云該部題奉

欽依及原行事理會同總兵官俞大猷按察司掌印官并該道守巡官再加酌議作速具由通呈詳奪等因奉此案照先爲軍務事奉本部院批據總兵官俞大猷呈詳登答條議緣由并奉巡撫殷正茂

案驗同前事已經本公司左布政使郭良臣會同各司叅遊等官議照古田僮寇稔惡百年流毒一省占據疆土虔劉人民甚至越會城刦司庫戕害方面藩臣神人之積憤蓋已極矣數十年來防守之兵星列而糧餉虛糜羈維之術日施而猖獗如故以致民生愈蹙

國計愈虧議者謂及今不處不獨古田難復北而臨桂永福義寧西而洛容柳城融縣皆大有可憂者矣仰荷

聖明南顧特設撫臣分

內帑爲經畧之圖若非大舉征討痛加芟夷因而撫  
挿殘徒設立司鎮以善其後非所以稱久安長治  
之計也所據各官造報圖冊議調兵馬及合用器  
械糧餉等項俱頗詳盡復該職等遂欵再加酌議  
因賊勢之強弱道路之險夷劑量增減務在隨宜  
設備先事預圖不敢徒惜小費致悞大計已將各  
項事宜通行呈詳未示今奉前因緣職見在軍門  
隨卽會同總兵官各司道叅遊覆加酌議除原冊

已具者不敢復開外所有合行續議事宜理合備  
開呈報伏乞鈞照轉詳施行

計開

一兩省兵馬錢糧俱係本部院總督卽今議調  
各土州狼兵共一十四萬刻限十月初一日  
至賓州分發各哨但各土州連年徵調往往  
藉口收穫延緩愆期每至春深雨發溪澗皆  
盈以致兵難久留功非全捷合無請乞本部  
院鈞牌速行左右兩江兵備道嚴加催促左

右叅將親詣督調務要如期齊到以便分發  
如有遲悞各道據實叅呈本部院從重處治  
一都狼總甫二哨逼近會城根本重地所當嚴  
爲隄備原議冊內議於省城召募精兵二千  
名專官訓練平時爲防守之兵臨事爲策應  
之兵班師爲善後之兵蓋各哨官兵雖曰分  
道並進而旁蹊曲徑可通内地者尚多萬一  
巢賊竄伏巖箐窺覘官兵已進從旁奔突擾  
掠鄉村何以爲策應之計故寧備而不用毋

致用而無備也今因軍餉匱乏省下募兵之議既已難行合無請乞軍門行蒼梧兵備道桃募精勇一千名選委將領官一員於八月間督赴省城專備策應庶幾聲援有賴內地無虞

一三鎮之設議用土官弟勇者非徒以二三千人之足恃也以父兄在州有不可犯之勢故也已蒙撫院責兩江叅將任其事矣議者謂不可必得則以冗人之有力量者當之職竊

謂必不可也合無請乞軍門嚴行各官務要  
於各大州分先期講定必足三鎮之數速  
取甘結馳報軍門以便舉事庶不失善後之  
計

一糧米原議冊內永福一萬二千石柳州府八  
千石又加議賓州一萬石若破賊甚速則支  
用儘裕但恐狼兵出遲則諸巢蓋藏已久難  
以因糧於敵積貯之計不可不廣合無請乞  
於桂林府再加米一萬石貯於臨桂之兩江

巡司臨期輸運古田接濟兵食縱令有餘亦可備善後之用蓋用米多則用銀少原非有所增損也但省下產米不多一時收買二萬餘石不惟米價騰湧虧累舖行且恐聲息張揚致賊驚竄查得桂林府廣儲倉每年額收糧米七萬餘石例于八月開倉令將臨桂義寧靈川三縣應納倉糧就近上納永福縣及兩江巡檢司二處聽分理糧賞官收貯陸續運發其該倉應給官軍月糧就支軍餉銀照

數給散蓋官軍利於折價官府得免買糧殆一舉而兩得矣乞行桂林糧賞監督二道查照速行以免遲悞

一大征舊規布政司奉軍門牌或准綜理糧賞道咨總發餉銀於各府收貯或以千計或以萬計聽糧賞道同監督道查照察驗所開逐項先期備辦置造若餉銀將盡糧賞道請發如前布政司并不預支費之事蓋發餉由於本公司支餉由於各道此事體宜然卽異日查

盤亦無牽帶混雜之累緣今桂林糧賞道參政柴淶右江糧賞道叅議張士純俱未到任若待到時然後備辦則遲不及事矣今右江分守道係兵備道帶管事有應糧賞道行者卽以分守道行之也其桂林糧賞道見有分守道帶管又監督道副使邵惟中已到一應糧賞道應行事務二道卽會同行之尤無不可者况此時府縣各官多有入簾之役應朝之行署印佐貳等官稍不經心必致稽緩悞

事均乞行催各道查照速行應備辦者作速  
備辦應置造者作急置造應支用者作急支  
用廣西地方百無所產動輒於廣東收買不  
免往返耽延軍情所係甚重不可不早爲之  
備也

一軍中合用兵火等器本當多備以供緩急之  
需但此間議論惟知狼兵破賊之易而不知  
今時之獵賊多悍今時之狼兵未必盡強也  
昨議及火器之時諸將多不願領至有欲以

原價繳回者蓋避冒破之嫌故也職竊謂進  
哨之初狼兵鋒銳本不可當若賊糾衆據險  
曠日持久則火器火藥之功甚不可少舉大  
事者不惜少費萬全之圖似不在此瑣細也  
合無請乞軍門行各監督道弁統督將官將  
原派火器等項務要如式製造以備擊刺如  
原派之數果不足用仍聽酌量再請添造毋  
徒邀節省之名致悞攻取大計則其責有所  
在也又查廣東韶州肇慶等府因大征二源

交還器械甚多併乞行查庫貯鍬鋤鋸斧百  
子銃等器盡借應用事完照數解還是亦省  
費之一道也

一議撫處外賊照得大舉之師專爲古田惡僮  
其各哨所經外賊村巢甚多如洛容之托洛  
斗等村融縣之思管等巢永福之九寨龍門  
等處皆當如先期多方撫諭或令良獐擔保  
或遣親屬質當但使之不與古田合夥不至  
爲土兵之梗足矣或議龍坑思管等哨欲於

大兵未進先用撫剿並施之策職竊謂必不可也從來用兵有乘勝順剿者有回師脅擒者未有先攻其近而後及遠先攻其瑕而後及堅者也若將調到狼兵或召募把截之兵先爲外攻之計全勝則兵力已疲不勝則銳氣已挫萬一本哨及各哨應剿之賊乘虛衝突將如之何此其所係恐不專在一哨也乞嚴行各統督官務圖大計毋急近功不負軍門委任之意

一議發兵路程照得狼兵十萬俱由賓州督發必照各哨抵巢日期遠近爲序以次而進不容紊亂叅差蓋兵法日行不過一舍况大調之兵總從一路每日所發約以萬計肩摩踵接勢難速行狼兵從來午後卽牧馬劄營縱十分督促行不過四五十里此舊例也今查各統督官造報圖冊自賓州至哨未有的確路程間有開稱一日至某處次日至某處者或七八十里或百餘里率皆以常程計之行

程不定則各哨之兵在途或緩或急到哨或先或後各統督官相隔既遠約會不及安能同日各抵信地不爽開刀之期耶賊據山巢四望甚近倘探知某哨官兵後期未進盡從此哨奔突將如之何頃歲大征二源惟從化一哨蒼梧發兵獨遲進哨稍後一日遂使英德翁源諸路二萬餘賊盡奔從化之鴨峒溪頭等山至盡調各哨官兵六萬且攻且守相持幾於二月始就殄滅皆本職所目擊其事

身當其難者此路程所係極爲緊要千里刻  
期三軍司命不可不慎重也請乞速行各統  
督官細加查訪其哨兵自賓州起第一日行  
若干里至地名某處宿歇第二日行若干里  
至地名某處歇宿計至十日或十五日以抵  
巢爲止各有的程其應該支糧去處寬算一  
日某哨兵總計抵巢共若干日各大哨之中  
又有小哨路程亦有遠近通計日期限八月  
中造報軍門并右江監督道以最遠者最先

發行挨次續發統督并領哨官照序督押不得時刻先後庶不誤刻期而他虞可免矣

一議分枝哨道照得古田地方調遭不下千里雖分七哨進兵而村巢散處路徑多歧以故各哨之中又有四五小哨今查各統督官造報圖冊開稱分爲幾枝其實哨路未查明的卽如都狼一哨爲上四里之地官兵時常出入今只知牛河三瓦一路而三小哨分路尚未周知况思管蓮塘等哨爲下六里地方往

來素所不經緝探素所不及者乎惟哨道不明則分布不密賊易奔逃一也阨塞不防賊易衝伏二也聲援不及賊易邀擊三也往歲官兵失利率多由此可爲明鑒請乞速行各統督官悉心查訪某哨分爲幾小哨各卽所經村分定爲哨名備查此小哨內某處崗嶺最險某處林箐最深某處防衝某處防伏某處應防包截分而必知所合進而必知所退必使首尾相應聲勢相聞某小哨該分兵若

干酌量險夷緩急預先議撥以便各哨官分領其或原定小哨太多恐兵分力薄審度事勢悉聽酌議歸併庶地利既明而勝算在我矣

一議渡兵橋船查得各哨官兵自賓州起行至思覽堡過小江一道至遷江縣過小江一道至來賓縣過大江一道至柳州府過大江一道內龍坑總甫等哨兵由柳州分路至洛容縣又過小江一道思管等哨兵由柳州分路

至地名石浪又過小江一道至融縣又過水東大江一道以上經過江道共七處兵馬衆多前後擁接橋船之計不可不備請乞預行右江兵備道轉行賓州遷江二州縣各搭浮橋四道來賓縣柳州府各刷大河船六十隻洛容縣搭浮橋四道融縣搭浮橋四道仍刷大河船四十隻俱聽候兵馬過河應用其浮橋仍行令各差官一員量帶軍兵嚴謹守護以防災毀之患

一議哨江兵船查得自永福縣下水至柳州江  
口路經蘭麻理定新安大潰一帶各灘頭係  
古田六里惡獵素所出沒之衝柳慶等府往  
來齋文人員時被刦擄而秋冬晴涸爲患尤  
甚先年設有會哨船隻交互接送江道稍靖  
近年以來柳州哨久廢卽永福哨船亦多敝  
壞不脩所僅存數隻一遇差遣徑送至大潰  
等處賊見船少兵稀公然據灘劫奪一二年  
間屢屢失事議者謂理定江道乃會城右臂

血脉所宜流通久當設法振頓以便軍民來往况今動調大兵巢賊聞風已久自九月以後分理糧賞道紀驗功次各大小委官及旗牌吏舍探報輸解人役往來絡繹皆所必經之地萬一賊窮勢逼掩吾不備捉擄緊要人員以爲阻兵之計將若之何誠不可不嚴之備也原議冊內永福一帶江道哨江狼兵打手五百名此皆原設哨江及守堡之兵非有所加也在平日旣患單弱在今用事之日

尚可因仍其舊乎又哨船未及添造尤非臨期所能卒辦請乞速行分巡撫夷道會同右江兵備道委官查估動支軍餉銀兩作急打造柳州府桂灘加哨船二十隻永福縣加哨船二十五隻其原議兵數不敷一併查議撥補務要上下哨護交相接替兩道各選委才幹千百戶一員專管其事必使江道大通往來無阻如有踈虞哨江官兵坐以縱寇之罪提督軍門李批據議於先後緩急機宜與

夫路程之計舟梁之備哨瞭之防此一時意  
念所不及者除通行各官遵照施行外待發  
兵日該司仍當面申飭之繳巡按李批據  
呈糧賞兵船等項均先事預防足補前議之  
所未備准各查照通行此繳

古田善後立鎮議

爲地方事隆慶四年十二月二十八日奉巡撫殷  
鈞牌查議古田立鎮緣由牌仰本司照依先今  
事理即便會同計議要見各鎮前項種子牛具房

屋堡城各應給與銀兩若干令其自行置辦如或原議短少應否再議增給使之安享富貴樂從承領俱二議處明白具呈詳奪施行奉此隨該本司左布政使郭應聘會同各司道議得大征之舉善後爲難善後之圖立鎮爲要已經題奉

欽依無容別議惟照土司之立所以彈壓猺獞保衛殘民其責甚重責之既重所以待之不可不優所以處之不可不備故必有城堡之設以壯其威必有廳署之建以崇其體必有營房之列以周其衛

必有廩糧之給以恤其私必有田畝之分以供其食必有牛種之資以充其用必有爵賞之榮以勵其心必有紀法之布以示其守處置周悉賞罰嚴明其孰敢不效忠竭力世守土地人民以自保富貴者哉今將會議過各項事宜備開于後湏至呈者

計開

一各鎮設當要害之地必湏城堡堅固可以侮禦峻防每鎮立大堡一所周圍一百二十丈

城牆高一丈二尺厚四尺基內外用石三四  
尺上用土磚砌蓋東西砌出小敵樓二處又  
設城門一座約堡一所用銀三百兩

一各鎮立衙門一所公堂三間兩廂房各一間  
住廳三間兩廂房各二間大門二門各一座  
約用銀二百兩以上堡城衙門每鎮各委文  
職官一員監督建造如銀兩不敷仍聽酌量  
申請處給務要用心督理以爲經久之計

一各鎮大頭目約二名每名住房一所各給銀

二十兩目兵二千名約蓋房二百間城內伍  
十間城外一百五十間每間銀一兩共該銀  
二百二十兩給蓋目兵自行蓋造

一每鎮土司官一員日支廩給銀一錢每月該  
銀三兩領兵大頭目一名每名月支口糧一  
石五斗每石折銀三錢又魚鹽各三斤折銀一  
三分二名每月共銀九錢六分散兵二千名  
每名月支口糧四斗五升折銀一錢三分五  
釐各魚鹽銀三分二千名每月共銀三百三

十兩一鎮官兵每月廩糧共用銀三百三十  
三兩九錢六分

一上官一員給田四十畝牛一隻領兵大頭目  
二名各給田二十畝共牛一隻目兵二千名  
每名給田五畝每十名共給牛一隻每牛一  
隻折銀一兩官兵通共用銀二百零二兩

一種子犁鋤等項器具土司官量給銀十兩領  
兵頭目二名共給銀二兩散兵每名給銀一  
錢兵二千名共給銀二百兩官兵通共用銀

二百一十二兩

一官兵守鎮地方必有定業方有固志聽各取  
妻子隨住且耕且守不許潛自逃回所當量  
給安居之費以示優恤土司官一員給銀十  
兩領兵大頭目二名每名給銀一兩散兵每  
名給銀二錢兵二千名共銀四百兩每鎮管  
兵共銀四百一十二兩

一三鎮之立議用土官第男者不惟以所部目  
兵足以制伏諸種尤以父兄在州兵強勢大

緩急可恃故也各州土官當思世受

朝廷浩蕩之恩竭忠圖報選機精銳土兵分與第男

防守本鎮以後若地方有警第男兵力不支

該州即便發兵前來策應務使寇靖民安地

方無虞第男之功即父兄之功也軍門論功

行賞未實授者奏准實授已實授者奏加服

色必不吝惜如分兵之初各州徒以老弱塞

責日後視若秦越不相應援者

國法昭然輕則降級重則削地

一各州官男官弟督兵守鎮務要時加練習謹  
守封疆初年以土舍名目給之冠帶以便管  
率兵民如果效勞安分保固地方三年無事  
授以土巡檢世襲立有大功仍奏加服級若  
不能約束目兵謹嚴防守及尅害民猺致生  
他釁者輕則革去冠帶重則革去巡檢職銜  
提督軍門李批據議詳妥俱依擬施行但  
安撫既定彼中自有膏腴之產可以樂生其  
牛具種子廩糧魚鹽似當限以年歲庶幾有

節也此外想尚有未盡事宜再議詳報

巡按李批立鎮事宜據議已明查照行繳

古田善後鹽餉議

爲稽往事議轉輸以圖足食足兵永保新復縣治  
事隆慶五年六月二十二日奉巡撫殷案驗前  
事准戶部咨該本部題覆內開議得巡撫都御史  
殷題稱新復古田縣治設兵防守財用匱乏無  
以爲繼乞要倣倣昔時官販海鹽故事以充兵食  
併開例條欵如議法守明賞罰會計工本造船隻

什物謹防範限時月禁私販明職掌謹始事無非  
綜理鹽法之意爲照廣西僻在一隅財用素稱缺  
乏每每取資別省邇者剿滅古田積寇本官慮旣  
平之後兵食無措查得至正德年間該省造城止  
以貿易海鹽獲利今查照故事兼訪之人情稽之  
土俗以爲經久計者區畫詳盡俱爲可行但買鹽  
雖在廣西出鹽則在廣東行鹽又至湖廣衡永事  
兼三省權屬各處撫按等官非止一省可得總攝  
若卽照欵擬覆升請增

勅責成恐中間議擬未定數爲更易殊非事體若待  
查勘會議僉同方議題覆則文移往返不無耽延  
歲月合趁本官在任經理一面將各項事宜仍行  
廣東廣西湖廣三省會議恭候

命下移咨本官并兩廣提督湖廣巡撫及咨都察院  
轉行各巡按御史悉照本官原議欵內事理着實  
舉行先嚴禁私鹽仍查所議船隻姑酌量造辦或  
暫顧民船試一行之果有成效方將船隻添造足  
數會同各官具題前來本部再行題

請將各官原領

勑內增添鹽法一節欽遵行事其未盡事宜悉聽本  
官會行各省隨宜酌處若中間事體當更彼此不  
便者亦要講求明白同心幹理務使事無阻窒利  
垂永久題奉

欽依備咨到院案仰抄回照依備奉

欽依內事理卽便轉行清軍分守糧儲等道弁所屬  
府州縣流土等大小衙門各一體欽遵查照該司  
仍會同各司道逐欽酌議要見文官應委何人領

帶錢糧武官應選何人可充把總何人可司監運  
其各衛所食糧旗軍餘丁作速通行取派又船隻  
應否一面照議酌量造辦或暫催民船務收成效  
與其中有未盡事宜悉會行一一酌議停當通呈  
詳奪施行等因奉此該本司左布政使郭應聘會  
同各司道議照轉輸鹽利以爲足兵足食之圖誠  
軍國之遠猷邊隅之永利也其經理之方防範之法  
責成之意莫不精密詳明無容復議但事體甚大  
謀始貴周利源所關得人爲急而所以變通盡利

損益宜民者又在臨事劑量非一時所能逆覩而  
預計者也今將應委文武官員等派旗軍打造船  
隻各項事宜理合開欵另具書冊便覽呈報伏乞  
照詳施行

計開

一管領錢糧文職責任頗重非廉且才者不能  
也桂林府僅有通判駱惟儼一員管糧捕盜  
勢難他委查得南寧府通判陳表潯州府通  
判朱成武俱堪委用今用運船二十隻合止

委通判陳表一員俟二運三運之後行委通  
判朱成武輪番督押以休勞瘁

一督運把總武職甚難其人查得桂林右衛指  
揮羅承勛年力方強堪充把總之委今運船  
止二十隻而旗甲亦多取之桂林二衛應止  
委桂林中衛千戶歐文賓一員以司監運  
一旗甲軍餘行准都司咨稱鹽船一百隻每船  
用旗甲一名軍夫二十名共用軍餘二千一

百名備查通省衛所見在食糧旗軍九千零

六十一名舍餘餘丁共二千六百三十八名  
二項通共一萬一千六百九十九名內以一  
千六百九十九名除作老幼事故等項大約  
以一萬石爲率每軍餘百名內撥取二十一  
名分別衛所量其數目多寡取用行令務要  
遴選家道殷實及有行止者方許送用查得  
桂林中右二衛旗軍名數雖多原係會省分  
撥哨守興安陽朔永福荔浦脩仁等地方差  
占及近奉點撥二百名前去永寧所防守似

難多派量於二衛取撥旗軍一百五十名餘  
丁一百二十名於柳州衛取旗軍一百二十  
名餘丁五十名象州所取旗軍三十名餘丁  
十名灌陽所取旗軍四十五名餘丁十五名  
全州所取旗軍六十名餘丁三十名平樂所  
取旗軍六十名餘丁六名梧州所取旗軍三  
十五名餘丁五名來賓所取旗軍十五名餘  
丁五名賓州所取旗軍三十五名餘丁十名  
南丹衛取旗軍七十名餘丁六名融縣所取

旗軍四十二名餘丁二十名武宣所取旗軍  
三十五名餘丁十名慶遠衛取旗軍九十五  
名餘丁二十五名河池所取旗軍五十名餘  
丁六名五屯所取旗軍一百二十名餘丁無  
鬱林所取旗軍二十五名餘丁五名潯州衛  
取旗軍六十二名餘丁二十名容縣所取旗  
軍三十五名餘丁五名奉議衛取旗軍二十  
一名餘丁九名向武所取旗軍六名餘丁無  
馴象衛取旗軍七十二名餘丁四十名南寧

衛取旗軍一百名餘丁二十名武緣所取旗  
軍五十名餘丁無貴縣所取旗軍三十五名  
餘丁五名太平所取旗軍一百名餘丁無富  
川所取旗軍五十五名餘丁十五名賀縣所  
取旗軍二十六名餘丁十四名懷集所取旗  
軍五十五名餘丁四十五名以上旗軍共一  
千六百零四名餘丁四百九十六名二項湊  
足二千一百名以充前數今運船二十隻合  
用軍餘四百二十名應先於桂林中右二衛

撥取軍餘二百七十名及附近全灌二所撥取軍餘一百五十名共計四百二十名應用一鹽船重載經過灘磯甚多必慣熟水道者方克有濟今以軍餘駕船若別用水手又增催募之費查得桂林二衛原撥府江廣運堡旗軍一百四十名熟識灘道且善撐駕卽將桂林二衛應撥軍餘更換回省分發各船尤爲省便

一鹽船往返日久若催倩民船應用未免妨民

且船非新造物料不堅亦恐悞事合先官造船二十隻其工料什物一照原議付官船旗甲打造或議大木馬船一隻裝鹽四萬三千七百五十斤載重灘高恐致壅滯應於內改十隻爲中船二十隻其旗甲軍餘及工料什物即以一船分作二船之用大小兼運驗其熟爲便利以便添造

一錢糧之會計運船之綜理官旗之取用經紀之選擇奸弊之稽查一應固積編號各項俱

屬糧儲道督理有成議矣其買鹽於廣東行  
鹽於衡永中間事體難以畫一仍聽該道隨  
時酌處期於公私俱便經久通行

一羅旁祿水及昭平府江一帶江道皆猺獞出  
沒之區鹽船經行干涉非淺羅旁祿水近督  
府節鎮之下有備可以無患而昭平以上水  
淺灘高諸猺尤橫合行府江兵備道及坐鎮  
都司設法隄防照例賞犒務令猺獞帖服以  
便船隻往來

一呈提督府

一呈巡撫殷 批事體妥帖處置詳明苟力行  
之庶幾永利也准速照行此繳

一呈巡按李 批據議參酌更詳准各照施行  
務俾底績此繳

預申給由請乞歸養文

爲預申給由事隆慶五年五月二十七日奉巡撫  
殷 批據本司呈詳左布政使郭應聘三年考滿  
例應給由赴部緣由奉批該司過歷甚久譽望擅

時祇緣會留致淹殊擢頃者地方事竣

簡命當蚤莫下矣當必無俟爪期亦必無用保留也

姑少待之此繳并蒙巡按李 批據本司經歷司

呈同前事蒙批本司歷著賢聲而總藩該省會計

精詳經理大征尤屢操慮茲當考績允宜會留布

政司會同按察司查議通詳報奪又奉提督李

批據本司呈亦同前事奉批該司譽望方隆徵拜

在卽且大征勞績

寵渥宜先給由之典似難以常格拘矣仰候會撫按

二院保留繳奉此行間隨准左布政使郭應聘咨  
稱查得嘉靖四十三年内奉撫按兩院案驗爲酌  
議考課之法以肅吏治事該吏部題覆兵科右給  
事中邢守庭題議內外官員給由事例內開其在  
外官員除方面府佐照舊赴京有事地方照舊保  
留等因題奉

欽依通行欽遵在卷照得赴京考覈乃外僚述職之  
常因事保留實地方權宜之計本省地方向因大  
征古田兵務勵勦議將司府應朝官員奏留供事

以職庸劣無狀亦奉保留不敢推諉廼今于戈載  
戢境土底寧餉需之出納綜覈已明善後之事宜  
次第具舉士民已慶太平之象地方非復有事之  
時矣若蒙將職留任免赴給由不惟虛糜祿俸自  
貽曠職之羞亦非酌議考課以肅吏治之意况職  
之私情尤有不容獲已者老母卓氏年幾八旬迎  
養十有三年未得還籍向以倭變之餘久嬰情于  
骨肉近因重病之後益動念於家鄉不遂歸心愈  
增病骨母顏一日不悅職之心不能一日自安啜

栗飲水既不得以盡其懽居位業官又不得以專  
所志臣義子情兩失之矣合咨本司轉達伏乞轉  
念准賜給由俾得順道奉母以歸既遵考課之明  
例亦遂鳥鳥之私情不勝祈懼激切之至准此擬  
合呈詳

給由請乞歸養議

爲時事多艱懼乞

聖明亟加注念併祈申

勅臣工脩急務以弭灾變以致治安事隆慶四年五

月初四日據經歷司呈抄蒙巡按廣西監察御史  
李案驗奉都察院巡按廣西二千三百三十九  
號勘合劄付前事仰抄案呈堂照依劄案備奉  
欽依內事理卽行掌印并分守等道查照本部原覆  
廣中事理不問資格崇卑或所屬或不係所屬如  
果真知其賢文書到日限一月以裏具由呈報以  
憑奏薦如全無其人亦要明白回報毋得違錯抄  
案依准呈來等因抄呈到司蒙此本月二十六日  
奉巡撫右僉都御史殷案驗同前事奉此已經

備行分守各道遵照去後今奉前因查得案驗內  
開不問資格崇卑或所屬或不係所屬如果真知  
其賢具由呈報以憑奏薦一節查與議處兩廣任  
人事宜緣由相同已從該案具詳毋容再議外惟  
照時事多難案驗內開至於淛江等一十三省左  
右布政使按察使以其資則當六卿督撫之選以  
其任則爲旬宣綱紀之司委當從宜甄別容本部  
移咨都察院轉行各該撫按官不分見任起用果  
有才難於大受力倦於奔馳者聽其各另具呈撫

按衙門會同酌議分別具奏一節已准本司左布政使郭應聘咨稱切緣質本顙庸既不堪於鞭策體常辱弱竟何補於驅馳竊祿廿年而涓埃未效歷官九任而尺寸無聞深懷尸素之慙重負苟宣之寄况八旬有母瘠土相依情每繫於晨昏職益妨於夙夜分當旱退庶免後艱伏乞俯容休致一以追曠官之誚一以申烏鳥之私本職不勝激切悚惶之至等因准此隨經具由通詳奉巡撫軍門批本官文明在中有倫有要柔順在外不激不隨

堅白之風歷官一轍幹濟之畧隨處有聲誠所謂  
年力方強才華遠到者計日當需大用聽候會議  
施行繳又蒙巡按察院批本司中外歷駁聲華藉  
甚其在西粵經理更優茲得借重苟宣地方之所  
倚賴者甚切豈宜亦動此念雖孝養固有至情而  
定省幸可自盡似當勉留以慰衆望也此繳蒙此  
已備咨遵照外查得本司右布政使按察司按察  
使俱員缺無憑議報緣奉行仰明白回報事理擬

合呈詳

卷十三 終